



Broj/ Број: 01/a-50-1-15-77/10
Sarajevo/Сарајево, 12. 5. 2010.

DOM NARODA
PARLAMENTARNE SKUPŠTINE
BOSNE I HERCEGOVINE

PREDMET: **O b a v j e š t e n j e**

Predstavnički dom Parlamentarne skupštine BiH je, na 77. sjednici, održanoj 12. 5. 2010., razmatrao materijale koji su u nadležnosti i Doma naroda, o čemu vas obavještavamo kako slijedi:

1. Zahtjev Zajedničke komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga izmjena i dopuna Kodeksa ponašanja poslanika i delegata u Parlamentarnoj skupštini Bosne i Hercegovine po hitnom postupku u skladu s članom 127. Poslovnika, Prijedlog broj: 01,02-34-6-649/10, od 7.5.2010.
2. Prijedlog zakona o autorskim i srodnim pravima, predlagač: Vijeće ministara BiH, zakon broj: 01,02-02-2-5/10, od 18. 1. 2010. (drugo čitanje),
3. Prijedlog zakona o kolektivnom ostvarivanju autorskih i srodnih prava, predlagač: Vijeće ministara BiH, zakon broj: 01,02-02-2-4/10, od 18. 1. 2010. (drugo čitanje),
4. Prijedlog zakona o primjeni rezultata analize dezoksiribonukleinske kiseline u sudskim postupcima, predlagač: Vijeće ministara BiH, zakon broj: 01,02-02-5-9/10, od 25. 1. 2010. (drugo čitanje);
5. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-7-11/10, od 28. 1. 2010. (drugo čitanje);
6. Prijedlog zakona o izmjenama i dopunama Zakona o finansiranju političkih stranaka, predlagači: poslanici Milorad Živković, Niko Lozančić i Šefik Džaferović, zakon broj: 01-02-4-25/10, od 24. 3. 2010. (drugo čitanje),
7. Prijedlog zakona o zabrani svih fašističkih i neofašističkih organizacija i upotrebe njihovih simbola u Bosni i Hercegovini, predlagač: Vijeće ministara BiH, zakon broj: 01,02-02-9-27/10, od 9. 4. 2010. (prvo čitanje),
8. Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini, predlagač: Vijeće ministara BiH, zakon broj: 01,02-02-5-28/10, od 14. 4. 2010. (prvo čitanje),
9. Prijedlog zakona o Javnom preduzeću za izdavanje službenih glasila Bosne i Hercegovine, predlagač: Vijeće ministara BiH, zakon broj: 01,02-02-9-32/10, od 22. 4. 2010. (prvo čitanje),
10. Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu,
11. Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini,

12. Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o izmjenama i dopunama Zakona o politici direktnih stranih ulaganja u Bosni i Hercegovini,
13. Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o protuminskom djelovanju u Bosni i Hercegovini,
14. Informacija o radu Tužilaštva Bosne i Hercegovine za 2009., materijal broj: 01-09-515/10, od 2.4.2010.,
15. Izvještaj o radu Državne regulatorne komisije za električnu energiju u 2009. godinu, materijal broj: 01,02-29-523/10, od 6.4.2010.,
16. Izvještaj o aktivnostima Ureda za reviziju institucija Bosne i Hercegovine za 2009. godinu, materijal broj: 01-50-3-512/10, od 12.4.2010.,
17. Izvještaj o radu Upravnog odbora Izvozno-kreditne agencije Bosne i Hercegovine za 2009. godinu, materijal broj:01,02-50-3-514/10, od 1.4.2010.,
18. Izvještaj o radu Nezavisnog odbora kao nezavisnog tijela policijske strukture u Bosni i Hercegovini za 2009. godinu i Plan rada Nezavisnog odbora kao nezavisnog tijela policijske strukture u Bosni i Hercegovini za 2010., materijali broj: 01,02-50-3-582/10, od 20.4.2010.,
19. Izjašnjavanje o Inicijativi poslanika Momčila Novakovića da se na sjednici Doma razmatra tačka dnevnog reda: „Utvrdjivanje smjernica za djelovanje privremenih delegacija koje, u ime Bosne i Hercegovine, učestvuju na međunarodnim skupovima
20. Davanje saglasnosti za ratifikaciju:
 - a) Sporazuma o finansiranju između Bosne i Hercegovine i Evropske investicione banke – Kredit Investiciono-razvojne banke Republike Srpske za mala i srednja preduzeća,
 - b) Sporazuma o zajmu između Bosne i Hercegovine i Međunarodne banke za obnovu i razvoj (IBRD) – poboljšanje pristupa finansijskim projektima za mala i srednja preduzeća,
 - c) Konvencije o zabrani kasetne municije – Oslo, 3. decembar 2008.,
 - d) Ugovora između Bosne i Hercegovine i Republike Srbije o izmjenama i dopunama Ugovora između Bosne i Hercegovine i Srbije i Crne Gore o pravnoj pomoći u građanskim i krivičnim stvarima.

Ad.1.

Predstavnički dom **usvojio je** Zahtjev Zajedničke komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga izmjena i dopuna Kodeksa ponašanja poslanika i delegata u Parlamentarnoj skupštini Bosne i Hercegovine po hitnom postupku u skladu s članom 127. Poslovnika.

Nakon toga **usvojio je** i Izmjene i dopune Kodeksa ponašanja poslanika i delegata u Parlamentarnoj skupštini Bosne i Hercegovine

Ad.2.

Predstavnički dom **usvojio je** sljedeći zaključak:

„Odgada se glasanje o Prijedlogu zakona o autorskim i srodnim pravima i vraća se Ustavnom pravnoj komisiji na usaglašavanje do naredne sjednice Doma.

Ad.3.

Predstavnički dom *usvojio je* sljedeći zaključak:

„Odgada se glasanje o Prijedlogu zakona o kolektivnom ostvarivanju autorskih i srodnih prava i vraća se Ustavnompravnoj komisiji na usaglašavanje do naredne sjednice Doma.“

Ad.4.

Predstavnički dom *usvojio je* u drugom čitanju Zakon o primjeni rezultata analize dezoksiribonukleinske kiseline u sudskim postupcima sa 18 amandmana koji glase:

Amandman I.

Član 1. mijenja se i glasi:

„Član 1. (Predmet)

Ovim zakonom utvrđuju se: uslovi i način prikupljanja i pohranjivanja tragova i uzoraka namijenjenih za analize molekula dezoksiribonukleinske kiseline (u daljnjem tekstu: DNK), primjena rezultata analize molekula DNK u krivičnim i drugim sudskim postupcima, te rokovi čuvanja i uklanjanja uzoraka i profila dobivenih analizom DNK.”

Amandman II.

U članu 2. stav (1) mijenja se i glasi:

„(1) Izrazi upotrijebljeni u ovom zakonu imaju sljedeće značenje:

- a) “Analiza DNK“ označava skup primijenjenih biohemijskih i molekularno-genetičkih metoda za izdvajanje molekule DNK iz biološkoga traga koji može poslužiti kao uzorak DNK, umnožavanje određenih genetičkih markera iz izdvojenih molekula DNK, elektroforetsko razdvajanje umnoženih fragmenata i sekvenci DNK, detekciju razdvojenih fragmenata i sekvenci, utvrđivanje prisutnih varijanti alela na markeru DNK ili slijeda baza u određenoj sekvenci DNK, odnosno analiziranom biološkom tragu.
- b) Rezultat analize DNK može biti profil DNK, redosljed baza u sekvenci DNK ili svaki drugi rezultat analize DNK koji se dobije primjenom za to propisanih forenzičko-genetičkih metoda.
- c) “Profil DNK” je uređeni niz numeričkih oznaka koje predstavljaju alele prisutne na analiziranim genetičkim lokusima, koji predstavlja individualnu identifikacionu molekularno-genetičku karakteristiku lica čiji je uzorak DNK predmet analize DNK.
- d) "Sekvenca DNK " je redosljed baza u analiziranom fragmentu DNK.
- e) “Genetički lokus” je tačno određeni dio molekula DNK, tj. fizički položaj gena ili odabranog genetičkog markera na hromosomu.
- f) “Alel” su modaliteti istog gena ili genetičkog markera s razlikom u redosljedu baza u sekvenci ili dužini sekvenci.
- g) „Biološki trag“ je svaki onaj biološki materijal koji se može dovesti u vezu s krivičnim djelom, iz kojeg se može izvršiti analiza uzorka DNK.
- h) “ Uzorak DNK ” je specifični uzorak bukalne sluznice, krvi, dlake, tkiva, tjelesnih tečnosti i svakog biološkog traga uzet za analizu DNK iz kojeg je moguće izolirati i analizirati DNK.

- i) „Identifikaciono svojstvo“ je svojstvo na osnovu kojeg se može utvrditi identitet nekog lica.
- j) „Identifikacioni podaci za profil DNK” su informacije u pisanoj ili elektronskoj formi na osnovu kojih se može ustanoviti biološko i fizičko porijeklo određenog profila DNK.
- k) "Sporni biološki trag" je trag nepoznatog individualnog porijekla, odnosno trag koji se može dovesti u vezu s krivičnim djelom, izvršiocem i ostalim subjektima, a za koji se u trenutku njegovog prikupljanja ne zna od koga potiče.
- l) "Nesporni biološki trag" je trag s tačno poznatim individualnim porijeklom traga, odnosno trag koji je po propisanoj proceduri prikupljen od nekog lica.”

Amandman III.

U članu 3. stav (1) na kraju teksta dodaju se riječi: “izdaje akreditacije za forenzičke laboratorije za analizu DNK.”

Amandman IV.

U članu 5. u stavu (2) na kraju teksta dodaje se rečenica:
„Genetski podaci deponovani u bazama podataka ne mogu se koristiti u svrhu prikupljanja podataka o tjelesnim ili zdravstvenim karakteristikama nekog lica.“

Amandman V.

U članu 7. stav (1) tačka b) riječi: „ i osuđenih lica“ brišu se.
Iza tačke b) dodaje se tačka c) koja glasi:
„c) osuđenih lica;“
Dosadašnje tačke c) i d) postaju tačke d) i e).

Amandman VI.

U članu 9. stav (1) tačka b) iza riječi „oštećenog“ dodaju se riječi: „ ili drugog lica na kojem je pronađen biološki trag koji je posljedica krivičnog djela.”

Amandman VII.

U članu 15. na kraju teksta briše se tačka i dodaju riječi: “ i uzorke izolirane DNK iz kojih je dobiven rezultat analize DNK.“

Amandman VIII.

U članu 17. iza stava (2) dodaje se stav (3) koji glasi:
„(3) Računari u kojima se nalaze osnovni podaci baze podataka DNK ne smiju biti umreženi u javno dostupnim računarskim mrežama.“

Amandman IX.

U članu 18. stav (1) iza riječi: „laboratorijama“ dodaje se zarez i riječi: „odnosno analitičarima DNK koji podliježu testiranjima u okviru programa za testiranje validnosti rada forenzičnih laboratorija DNK i forenzičnih analitičara DNK propisanim od strane Agencije.“
U stavu (2) tačka b), iza riječi: „laboratorijama“, dodaje se zarez i riječi: „odnosno analitičarima DNK iz tih laboratorija”. U istom stavu, iza tačke d) dodaje se tačka e) koja glasi:

- e) „Istraživačima, u naučne svrhe nakon uklanjanja identifikacionih oznaka, s ciljem razvoja baza podataka za populacionu statistiku, usavršavanja procedura vezanih za proces identifikacije i kontrole kvaliteta analiza DNK na osnovu prethodnog pismenog odobrenja direktora Agencije.“
- f)

Amandman X.

U članu 18. stav (2) tačka a) iza riječi „ DNK“ dodaje se riječ „referentnim“.

Amandman XI.

U članu 23. iza riječi: „(SIPA)“ dodaju se riječi: „ i Ured za saradnju s Interpolom ako je međunarodna pravna pomoć zatražena putem tog Ureda”.

Amandman XII.

U članu 26. riječi: „15 godina“ zamjenjuju se riječima: „25 godina“.

Amandman XIII.

U članu 27. riječi: „30 godina“ zamjenjuju se riječima: „40 godina“.

Amandman XIV.

U članu 28. riječi: „15 godina“ zamjenjuju se riječima: „25 godina“.

Amandman XV.

Član 29. mijenja se i glasi:

„Član 29.

(Uništavanje uzoraka DNK)

Uništavanje uzoraka DNK vrši se istovremeno s uklanjanjem profila DNK na koji se uzorak DNK odnosi.”

Amandman XVI.

Nakon člana 31. dodaju se novi članovi 32. i 33. koji glase:

„Član 32.

(Rok za donošenje podzakonskih akata)

U roku od devet mjeseci od dana stupanja na snagu ovog zakona, direktor Agencije donijet će pravilnike kojima će se urediti: način prikupljanja, pakovanja i uzimanja materijala i uzoraka za potrebe analize DNK u sudskom postupku, način uspostavljanja i održavanja baze podataka, zaštite podataka u skladu s propisima o zaštiti tajnih i ličnih podataka i druge podzakonske akte potrebne za provođenje ovog zakona.

„Član 33.

(Naknadni unos podataka u registar DNK osuđenih lica)

U skladu sa uslovima koji će biti propisani krivičnim zakonodavstvom u Bosni i Hercegovini, Agencija će u registar DNK osuđenih lica unositi profil lica koje bude pravosnažno osuđeno, a čiji se profil ne nalazi u bazi podataka.”

Postojeći članovi 32. i 33. postaju članovi 34. i 35.

Amandman XVII.

U novom članu 34. riječi: „Stupanjem na snagu” zamjenjuju se riječima: „Danom početka primjene.“

Amandman XVIII.

U novom članu 35. riječi : „30.6.2010. godine“ zamjenjuju se riječima: „31.3.2011. godine.“

Usvojen je i zaključak proizašao iz rasprave koji glasi:

„Predstavnički dom Parlamentarne skupštine BiH traži od Ministarstva sigurnosti BiH da, u kontaktu s Federalnom upravom policije utvrdi pravo korištenja donirane opreme i ukoliko je to država Bosna i Hercegovina, da osigura prenos te opreme na Agenciju za forenzička ispitivanja i vještačenja.“

Ad.5.

Predstavnički dom *usvojio je* zaključak predložen u toku rasprave koji glasi:

„Odgada se izjašnjavanje o Prijedlogu zakona o izmjenama i dopunama Zakona o radu u institucijama Bosne i Hercegovine za 78. sjednicu Doma i zadužuje Ustavnopravna komisija Predstavničkog doma Parlamentarne skupštine BiH da, u duhu rasprave o Prijedlogu zakona o izmjenama i dopunama Zakona o radu u institucijama Bosne i Hercegovine, analizira sporni Amandman XXIII. Ustavnopravne komisije, u saradnji s Ministarstvom pravde BiH, i pokuša naći kompromisno rješenje kako bi se nastali problem riješio.“

Ad.6.

Predstavnički dom *usvojio je* Zakon o izmjenama i dopunama Zakona o finansiranju političkih stranaka u drugom čitanju.

Ad.7.

Predstavnički dom *odbio je* Prijedlog zakona o zabrani svih fašističkih i neofašističkih organizacija i upotrebe njihovih simbola u Bosni i Hercegovini u prvom čitanju.

Ad.8.

Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini nije dobio potrebnu entitetsku većinu, pa slijedi usaglašavanje u Kolegiju kao komisiji.

Ad.9.

Predstavnički dom *odbio je* Prijedlog zakona o Javnom preduzeću za izdavanje službenih glasila Bosne i Hercegovine u prvom čitanju.

Ad.10.

Predstavnički dom *usvojio je* Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu.

Ad.11.

Predstavnički dom *usvojio je* Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini.

Ad.12.

Predstavnički dom *usvojio je* Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o izmjenama i dopunama Zakona o politici direktnih stranih ulaganja u Bosni i Hercegovini.

Ad.13.

Predstavnički dom *usvojio je* Izvještaj Zajedničke komisije oba doma o nastojanju za postizanje saglasnosti o identičnom tekstu Zakona o protuminskom djelovanju u Bosni i Hercegovini.

Ad.14.

Predstavnički dom *primio je k znanju* Informaciju o radu Tužilaštva Bosne i Hercegovine za 2009. godinu i usvojio prijedlog iz Mišljenja Komisije koji glasi:

„Predlaže se da Predstavnički dom i druge institucije na koje se odnose ove preporuke podrže navedene prijedloge aktivnosti za efikasniji rad Tužilaštva BiH u narednom periodu.“

Ad.15.

Predstavnički dom *usvojio je* Izvještaj o radu Državne regulatorne komisije za električnu energiju u 2009. godini.

Ad.16.

Predstavnički dom *usvojio je* Izvještaj o aktivnostima Ureda za reviziju institucija Bosne i Hercegovine za 2009. godinu.

Ad.17.

Predstavnički dom *odgodio je* raspravu o Izvještaju o radu Upravnog odbora Izvožno-kreditne agencije Bosne i Hercegovine za 2009. godinu zbog neprisustva podnosioca Izvještaja.

Ad.18.

Predstavnički dom *usvojio je* Izvještaj o radu Nezavisnog odbora kao nezavisnog tijela policijske strukture u Bosni i Hercegovini za 2009. godinu i Plan rada Nezavisnog odbora kao nezavisnog tijela policijske strukture u Bosni i Hercegovini za 2010. godinu.

Ad.19.

Dom *je usvojio* Inicijativu da se na sjednici Doma razmatra tačka dnevnog reda: „Utvrđivanje smjernica za djelovanje privremenih delegacija koje, u ime Bosne i Hercegovine, učestvuju na međunarodnim skupovima.“

Ad.20

Predstavnički dom dao je saglasnost za ratifikaciju:

- a) Sporazuma o finansiranju između Bosne i Hercegovine i Evropske investicione banke – Kredit Investiciono-razvojne banke Republike Srpske za mala i srednja preduzeća.
- b) Sporazuma o zajmu između Bosne i Hercegovine i Međunarodne banke za obnovu i razvoj (IBRD) – poboljšanje pristupa finansijskim projektima za mala i srednja preduzeća,
- c) Konvencije o zabrani kasetne municije – Oslo, 3. decembar 200 8.,

- d) Ugovora između Bosne i Hercegovine i Republike Srbije o izmjenama i dopunama Ugovora između Bosne i Hercegovine i Srbije i Crne Gore o pravnoj pomoći u građanskim i krivičnim stvarima.

PREDSJEDAVAJUĆI
PREDSTAVNIČKOG DOMA
Niko Lozančić